

Қарымды қалам иесі



Ә.Боранбаев атындағы кинотеатрда қалалық ардагерлер кеңесінің ұйымдастыруымен журналист А.Е.Айтмағамбетовпен кездесу кеші өткізілді.

Арыстан Есмұхамбетұлы өңірдің ақпарат саласының өркендеуіне зор үлес қосып келе жатқан жанның бірі. Кезінде қалалық - апталық «Торғай» газетінен Ахметхан Байжан, Майра Шөкен сынды белгілі журналистерден тәлім алып, кейін жаңадан ашылған «Арқалық хабары» газетінің қадамының қарыштауына айрықша еңбек сіңірді. Қос басылымның да директор - бас редакторы болды. Қалам ұстаған жастарға үнемі қамқорлық жасады. Соның бір айғағындай қаладағы қосымша білім беру орталығына қарасты «Сәлем» жас тілшілер үйірмесінің қанатын кеңге жаюына мүмкіндік туғызды.

- Қалалық ардагерлер ұйымы жанынан құрылған «Ана - дария», «Қазыналы қариялар» мектептері көптеген ізгі істерге мұрындық болып келеді. Қазір «Ана - дария» мектебі республикалық деңгейге жетіп, «Аналар кеңесі» атты тұғырға көтерілді. Бүгінгі іс - шарамыз «Қазыналы қариялар» мектебінің жоспары бойынша өтіп отыр.

«Арбаның алдыңғы дөңгелегі қайда жүрсе, соңғы дөңгелегі сонда жүреді» - деген Аға буынның ізін лайықты жалғастырып келе жатқан орта буын өкілдері де аз емес. Солардың бірі - осы кездесу кешіміздің иесі Арыстан Есмұхамбетұлы, - деді кешті тұшымды етіп жүргізген қалалық ардагерлер кеңесінің төрағасы Жәнібек Рапбасұлы.

Бүгінде қалам ұстаған жастардың ақылшысына айналған азамат балалық шағында ұшқыш болуды армандаған екен. Ол журналистер отбасында дүниеге келген. Әкесі Есмұхамбет Айтмағамбетов республикаға танымал қалам иесі болған.

«Бала кезімде ата - анам маған бата жина» дейтін. Үлкендерден бата алуға тырысатынбыз. Осындай дәрежеге жетуімді сол жинаған баталарымның арқасы деп білемін», - дейді Арыстан Есмұхамбетұлы ағынан ақтарылғанда.

Қаламы қарымды журналист Арыстан Айтмағамбетовтің мақалалары облыстық байқауларда 3 рет жеңімпаз атанған. «Кәсіпкерлік - жаңа мүмкіндіктер» (2010 ж), «Қуатты қазақстанды бірге құрамыз» (2011 ж), «Ұлт бірлігі» аталымы (2013 ж).

«Қазақстан Республикасының тәуелсіздігіне - 20 жыл» мерекелік медальмен, облыс әкімінің грамотасымен (2 мәрте) марапатталған. 2015 жылы «Арқалық қаласының жыл адамы» атанды. Қазіргі таңда қалалық сайлау комиссиясының төрағасы және қалалық қоғамдық кеңестің төрағасы болып қызмет жасайды.

Кездесу кешінде «Nur Otan» партиясы Арқалық қалалық филиалы төрағасының бірінші орынбасары Сабыржан Тасмағанбет, Арқалық қаласының құрметті азаматтары: Кәкі Ақан, Хамит Досжан, Жұмағали Өмірбек, Шөптібай Байділдин, жұбайы Сәуле Айтмағамбетова және әріптестері сөз алып, кеш иесі жайлы парасатты ой - толғамдарын ортаға салды.

Тағылымды кешке қалалық мәдениет сарайы қолдау көрсетті.

Мұрат ЖҮНІСУЛЫ